

明史藁

列傳第一百四十六

光祿大夫 經筵講官明史總裁戶部尚書加七級臣王鴻緒奉
敕編撰

賀逢聖

冠

南居益

周士樸

呂維祺

馬從聘

王家禎

張伯鯨

宋 玫

沈 迅

焦源溥

高名衡

李夢辰

宋師襄

徐 洲

鹿善繼

麻 儻

賀逢聖字克繇江夏人舉於鄉家貧就應城教諭萬曆四十
四年由殿試第二人授翰林編修天啓時歷官洗馬魏忠賢
開湖廣生祠上梁文出逢聖筆特詣之逢聖曰此借銜陋習

耳予安能數千里外爲人作文忠賢拂然去誣以營求典試
削其籍莊烈帝卽位起故官崇禎元年累遷少詹事遭外艱
廬墓三載還朝進詹事拜禮部右侍郎改吏部進左尋擢禮
部尚書九年六月以本官兼東閣大學士入閣輔政尋加太
子太保改文淵閣溫體仁罷歸張至發爲首輔逢聖與善給
事中丁允元劾其引宵人汪應龍詆斥正人高攀龍左光斗
力爭發譴黃道周逢聖爲屬草時論非之十一年致政歸歷
陳道中所見災傷及郵傳困敝狀報聞十四年與周延儒同
召還朝帝待之不如延儒遠甚充位而已明年正月朔旦帝
行尊師禮揖輔臣皇極殿逢聖亦與焉屢疏引疾至六月得
請帝將增置閣臣召延儒逢聖等賜坐德政殿逢聖謝恩大

哭不止駕移中極殿諸輔臣隨入賜宴逢聖復大哭拜跪十
數不已衆咸怪之詔賜道里費八十金彩幣四表裏大紅蟒
衣一襲遣行人護歸瀕行疏謝因救尚書李日宣等帝優詔
荅焉十六年六月張獻忠圍武昌逢聖晨夕登陴與士卒同
饑困數日城陷亟詣楚王府邀與同死不知王所在遂被賊
執叱之曰我朝廷大臣若輩不得無禮賊麾使去乃北向五
拜三稽首投墩子湖死妻危氏子觀明子婦曾氏陳氏孫三
人皆從死次子光明自他所來赴亦死之事定有司覓其屍
閱八日顏色不變福王時贈少傅諡文忠祭葬廕子如制逢
聖居相位無可稱然生平苦節自甘束修砥行其學以一念
不起爲極晚節一門殉難洵不易所守云莊烈帝時執政五

十人孫承宗逢聖范景文皆死國其後復有傅冠冠字元甫
進賢人祖爛南京刑部尚書天啓二年冠舉進士第二授翰林
編修崇禎中累官禮部右侍郎十年八月拜禮部尚書兼
東閣大學士有章奏發自御前者冠以爲揭帖援筆判其上
旣知悞惶恐引罪帝卽放歸唐王時命以原官督師恢復江
西或劾其嗜酒乃許致仕

大清下江西冠寓居門人泰寧汪亨龍家亨龍執以獻有司
不屈被僇於汀州血漬地久而猶鮮汀人歎其忠

南居益字思受渭南人尚書企仲族子師仲從子也曾祖從
吉與曾伯祖大吉皆進士兩人子姓科第相繼企仲大吉孫
萬曆八年進士以祖母年高請終養爲張居正所惡下撫按

勘問祖母旣歿授刑部主事客寓貲其家夫婦並歿企仲呼其子還之吏部尚書孫丕揚以爲賢調爲已屬歷文選郎擢太僕少卿進太僕卿三十年帝以疾詔免礦稅釋繫囚錄建言貶斥諸臣旣而悔之命礦稅如故餘所司議行吏刑二部尚書李戴蕭大亨遲數日未奏企仲請亟罷二人而救二部亟如詔奉行帝大恚傳諭亟停二事落企仲一官給事中蕭近高御史李培余懋衡亦請信明詔帝益怒並奪其俸且命益重前貶謫官鄒元標等罰欲以鉗言者諸閣臣力爭乃止而給事中張鳳翔迎帝意劾企仲爲吏部時嘗擠同官武之望故假建言博名遂削籍天啓初起太常卿累遷南京吏部尚書以老致仕師仲父軒吏部郎中嘗著通鑑綱目前編師

仲至南京禮部尚書居益少厲操行舉萬曆二十九年進士授刑部主事御史曹學程繫獄十年居益提牢言學程有母年九十餘陛下方以聖母徽號推恩海內柰何獨斬此一人不報三遷廣平知府擢山西提學副使鴈門參政繕治亭障省費萬計歷按察使左右布政使並在山西天啓二年入爲太僕卿明年擢右副都御史巡撫福建海外紅毛夷者國名和蘭自昔不通中土由大泥咬啣吧二國通閩商萬曆中奸民引其人據澎湖求市巡撫徐學聚令轉販之二國二國險遠商舍而之呂宋夷人疑呂宋邀商舶攻之又寇廣東香山澳皆敗不敢歸國復入澎湖求市且築城焉巡撫商周祚拒之乃屢肆侵犯會居益代周祚賊方犯漳泉招日本大泥咬

啍吧及海寇李旦等爲助居益使人招旦說攜大泥咬啍吧
賊帥高文律懼遣使求款斬之決策進討築城鎮海港賊退
保風櫃將士逼之相持二旬賊窮蹙泛舟去文律拒守攻擒
之海患乃息五年遷工部右侍郎總督河道魏忠賢銜居益
叙功不及已格其賞給事中黃承昊復論居益倚傍門戶躡
躡通顯遂削籍去閩人詣闕訟之不聽乃立祠以祀勒碑於
澎湖及平遠臺崇禎元年起戶部右侍郎總督倉場陝西鎮
缺餉至三十餘月居益請以陝賦當輸關門者留三十萬紆
其急報可畿輔戒嚴居益在通州爲城守計其備會工部尚
書張鳳翔坐軍械不具下吏四司郎中瘕死者三遂召居益
代鳳翔未幾試礮而炸兵部尚書梁廷棟劾郎中王守履失

職守履懼誅兵部郎中王建侯誣已廷議不如守履言遂下獄居益疏掾帝以爲徇私削籍歸廷杖守履六十斥爲民尋叙城守功復居益冠帶十六年李自成陷渭南責南氏餉一百六十萬金仲年八十三遇害賊誘降居益及金仲子禮部主事居業皆不從明年正月賊遣兵擁之去加炮烙二人終不屈絕食七日而死

周士樸字丹其商丘人萬曆四十一年進士除曲沃知縣泰昌元年徵授禮科給事中累遷工科都給事中中官王添爵趨淨身男子索賄激變守陵劉尚忠鼓陵軍挾賞劉朝等假齎送軍器名出行山海外勢洶洶織造李實訐周起元羣璫索冬衣辱尚書鍾羽正士樸皆疏爭居垣中數年數與中官

相摭拄深爲魏忠賢所惡會當擢京卿忠賢持不下士樸遂
謝病歸崇禎元年起太常少卿歷戶部左右侍郎拜工部尚
書帝命中官張彝憲監戶工二部出納士樸恥與共事數相
齟齬彝憲訐於帝士樸疏對詞直帝無以難以和衷慰勉而
心甚銜之未幾駙馬都尉齊贊元以遂平長公主塋價士樸
不引瑞安大長公主例而壽寧大長公主薨則引瑞安例上
疏醜詆之帝遂削其籍十五年廷臣交薦不召其年八月李
自成陷商丘與妻曹氏妾張氏子舉人業熙子婦沈氏同日
縊死

呂維祺字介孺新安人祖母牛氏以守節被旌父孔學事母
盡孝晚年捐粟千二百石賑饑兩旌孝義維祺舉萬曆四十

一年進士授兗州推官擢吏部主事更歷四司光宗崩皇長子未踐阼內侍導幸南城維祺謁見慈慶宮抗言梓宮在殯乘輿不得輕動乃止退陳保護聖躬極言左右侍御之宜愼因請罪崔文昇李可灼速李選侍移宮報聞天啓初歷考功文選員外郎進驗封郎中乞假歸四年推考功郎中魏忠賢惡其異已不用開封建忠賢生祠遺書士大夫戒使勿預忠賢毀天下書院維祺立芝泉講會祀伊洛七賢講論不輟崇禎元年起尚寶卿遷太常少卿督四夷館明年四月廷議軍餉維祺奏陳十五事且論行鈔之利惟鈔法議格餘多允行其冬奏防微八事言陛下初勤批答近始有留中者留中多則疑慮起當防者一初虛懷商榷及擬旨不當乃改擬徑行

其中固有當執奏者安得廢匡救當防者二初本無疑厭疑
厭皆諸臣自取乃偏黨說起共夔並進當防者三初日御講
筵近始傳免當防者四初寡嗜欲慎宴游近或偶涉當防者
五初慎刑獄今有下詔獄者且登聞鼓擊恐長譟訟風當防
者六初重廷推今間用陪者非常典當防者七初樂讜言今
雷霆時震當防者八俄陳純聖德熙聖治三事並優旨報之
三年由太常卿擢南京戶部右侍郎總督糧儲馳疏陳道中
所見民生憔悴及倉庾空匱狀帝命核致匱之由因言北部
借支折色九十三萬兩有奇貴州及漕運借支本色二百五
十一萬石有奇是以甚匱維祺乃設會計簿鈎考隱沒侵欺
及積逋不輸者各數十百萬大者彈奏小者捕治又立法嚴

督屯課倉庾漸充尋疏言天下大可憂者非止一端而財用不足爲最甚因條上六議曰稽出入以杜侵漁增比較以完積案設本科以重題覆時會計以覈支收定差序以杜營私禁差假以修職業帝稱善卽行之四年冬遣中官出鎮維祺抗疏切諫并責閣臣不能匡正詞甚鯁直已又極陳蕪湖設關之害請停罷不從六年拜南京兵部尚書參贊機務清冒伍八千餘名軍政修舉八年正月流寇犯江北遣參將薛邦臣防全椒趙世臣戍浦口無何世臣潰走南京震動而鳳陽旋告陷會大計拾遺兩京言官交章劾奏詔解任南京言官復劾其他事遂除名維祺嗜正學私淑孟化鯉在兗州及南都皆集諸生講學歸寓洛陽立伊洛會以迪後進及門者二

百餘人十二年河洛大饑盡出私廩賑濟詔復其官十四年正月李自成大舉寇洛陽維祺分守北城總兵王紹禹親軍內應之城陷維祺被執詬詈求速死北向拜君西向拜父母延頸就刃年五十有五贈太子少保祭葬廕子如制福王時加贈太傅諡忠節弟維祐字泰儒由選貢生爲樂平知縣解職歸十六年賊陷新安亦抗節死贈按察僉事

馬從聘字起莘靈壽人萬曆十七年進士授青州推官決獄有聲擢御史勛衛李宗城冊封平秀吉逃歸從聘言其父言恭不當復督戎政不從出理兩淮鹽課言近日泰山崩離析者一里有餘由開礦斷地脉所致不可不速罷不報奸人田應璧請掣賣沒官餘鹽助大功帝卽遣中官魯保督之從聘

極陳其欺罔狀不從還朝改按浙江又按蘇松疏論蘇松常
鎮增稅課之害乞減免不報以久次擢太僕少卿拜右僉都
御史巡撫延綏失事奪俸旣而有擣巢功會引疾歸兵科趙
興邦請叙不報後加兵部右侍郎家居二十餘年屢薦不起
崇禎十一年冬

大清破靈壽從聘北面再拜顧三子曰吾大臣義不可辱汝
曹生無害也三子不從皆自縊從聘死年八十二贈兵部尚
書諡介敏官其一子同邑耿蔭樓字旋極天啓中任臨淄知
縣有倡邪教謀不軌者蔭樓勦破之久旱囚服暴烈日中哭
於壇雨立澍兼攝壽光事禱雨如臨淄崇禎中入爲兵部主
事調吏部歷員外郎乞假歸城破偕子參並死之贈光祿少

卿

王家禎長垣人萬曆三十五年進士天啓五年歷官右僉都御史巡撫甘肅松山部長銀定反成擾西鄙二十餘年自家禎受任三犯三却之先後斬首五百四十擢戶部右侍郎轉左崇禎元年二月攝部事邊餉不以時發至七月遼東兵鼓譟巡撫畢自肅自縊死帝大怒削家禎籍尋叙甘肅功復其冠帶九年七月京師被兵起兵部左侍郎未幾總理盧象昇入衛命家禎以本官兼右僉都御史總理河南湖廣山西陝西四川江北軍務代象昇討賊會河南巡撫陳必謙罷卽命兼之中州賊爲象昇必謙所蹙勢少衰及兩人去諸將左良玉陳永福羅岱等彼此觀望馬進忠等復蔓南陽家禎督將

士會勦賊不敢大逞而楚人在朝者言家禎高臥汴梁置全楚度外帝下詔切責乃遣兵救襄陽大戰牌樓閣亦不能大創其冬家丁鼓譟燒開封西門家禎暮夜自外歸慰諭加犒賞發往南陽討土寇楊四乃定楊四者舞陽劇盜也與其黨郭三海侯馭民等降於陳必謙旣而復叛大爲南陽汝寧患南陽同知萬年策與監紀推官湯開遠諸將良玉及牟文綬等連破之四焚死馭民三海亦爲參將陳永福副將龍在田守備劉洪起等所破擒土寇畧定是時流賊盡趨江北留都震驚良玉旣平四往援擊走賊湖北給事中羅志儒言家禎奉命討安慶賊未嘗一出中州帝以家丁之變已心輕之而給事中鍾斗亦上疏請更總理家禎遂稱病帝難其代不許

至四月以總理授熊文燦令家禎專撫河南文燦未至曾安慶告警詔遣良玉赴援家禎以中原方急守便宜不遣其秋劉國能等犯開封裨將李春貴等戰歿家禎拒守賊乃去敗書聞令所司議罪文燦亦已至軍乃落職閒住十七年李自成陷京師遣兵據長垣設僞官家禎謀舉兵誅之未發爲賊所覺與子元炆並自經死

張伯鯨字繩海江都人萬曆四十四年進士歷知會稽歸安鄞三縣天啓中大計調補盧氏崇禎二年稍遷戶部主事出督延寧二鎮軍儲自黃甫川西抵寧夏千二百里不產五穀芻粟資內地賀蘭山沿黃河漢唐二渠東抵花馬池素沃野亦荒蕪甚伯鯨疏陳其狀爲通商惠工轉菽麥又倣邊商中